


OMUFINDANI

OMUNAENGHONO MUNENE

 Mwalele po, kunye. “Opaasa Yehafo” lela kukeshe umwe womunye! Eli olimwe lomomafiku manenenene, edimbuluko lenyumuko lomwene wetu. Olimwe lomomafiku manenenene ondjokonona younyuni aushe. Olo enyumuko. Ndele otwa hafa unene oku kala apa, ongula ei, mefiku eli linene. Noku mona etango tali piti, neengala tadi piti kedu, kesheshimwe tashi popi Opaasa.

Ndele paife natu nyongamekeni omitwe detu okafimbo.

² Tate, Kalunga, mOukalipo Woye otwe uya. Ndele otwe Ku teelega u tu pe, ongula ei, eyambeko linini la wedwa ko okudja kEulu, ekumo lonhumba linini lOpaasa meemwenyo detu; kutya, ngeenge hatu di apa, ohatu dulu okutonga, ngaashi ava va dja kuEmaus, “Omitima detu inadi xwama tuu mufye, molwaashi Oukalipo Waye?” Osheshi, otwe shi indila mEdina Laye, nomolwa efimano Laye. Amen.

³ Lwomembo laxuuninwa, ekapiteli eti²⁸ lEvaengeli lOmuyapuki Mateus, novelise oni⁷, onda hala oku lesa eleshelo, ngaashi hatu i melongelokalunga.

Ndele indeni nee nokweendelela, mu ka lombwele ovalongwa vaye kutya ye okwa nyumuka koufi; ndele, tala, ye ote mu tetekele okuya kuGalilea; oko tamu ke mu mona: tala, Onde mu lombwela.

⁴ Opa kala omatumo manene mahapu a pewa omulumenhu novanhu vokedu oku. Ashike inapa kala etumo la fimana latya ngaho la pewa ngaashi ou ngaha, “Indeni mu ka lombwele ovalongwa Vaye kutya Ye okwa nyumuka koufi.” Olo etumo linene. Nomukalo auke tali dulu oku yandjwa, owa li molwaashi ope noku kala efindano linene, tete.

⁵ Opa kala omulumenhu mefimbo letu, nomefimbo la pita, nomondjokonona inene younyuni ou, nomumanene, omapya olwoodi a mbwalangadja; opa kala ovafindani vahapu vanene, oinima ihapu inene ya ningilwa omuhoko wounhu.

⁶ Onga oshihopaenenwa, ohandi lipula, ngaashi nde uya ongula ei, nda penduka kuyeke, ndele nghi na omhito yoku lilonga unene. Molwaashi, nghi shii kutya oshitopolwa shilipipo, onguloshi, hatu kala tu na nena, pokati komufitaongalo naame, melongelokalunga. Ashike mondjila yange, onde lihanga handi lipula kutya, ongula ei, otai kala dingi ndi shii oku lombwela ovanhu Vaye, oku twala etumwalaka. Onde lipula ngaha, “Indeni

mu ka lombwele ovalongwa Vaye.” Paife, *ovalongwa Vaye* “ovashikuli” Vaye. *Omulongwa* oye “umwe ou a shikula.” Ndele onde lipula oshilongwa eshi, sho, *Omufindani Omunaenghono Munene*.

⁷ Ndele oku lipula nhumbi ovafindani vahapu vanene tu na mounyuni omu, noinima inene va ninga oku xumifa xwepopaleka omukalo wovanhu wokukala. Okwa li handi lipula Napoleon munene, nale mefimbo laye, nhumbi aha li naana Omufranisa, ashike oku na sha momadiladilo aye. Tete, okwa—okwa xupula France, ke mu hole. Okwa dja keenhunu. Ashike oku na ediladilo momadiladilo aye, kutya, fiku limwe ota kala omufindandi. Netomhelo olo e na ei momadiladilo aye, oku noku kala e na sha oku longa mo.

⁸ Komulumenhu keshe, manga ino longa oshilonga, ou noku kala u na elalakano lonhumba, ehoololo lonhumba, shimwe to dulu oku longa mo, molwa elalakano lokulonga, shimwe oku longifa.

⁹ Ngaashi atushe tu shi shii, moku kufa ondjokonona yaHitler . . . ile, ha Hitler, ashike ya—yaNapoleon, kutya okwa ya komwedi, nomoku lundulula eenyofi. Osho a longa, noku teelega; molwaashi oshikando shimwe osho a ninga, nokwa mona efindano. Ndele okwe uya moFrance, nokwa ninga ependa linene. Okwa dipaa ovanhu vahapu, molwaashi kutya inava twa kumwe naye. Nokwa yeleka oshilonga shaye ashishe, kesheshimwe shi li omhinge naye. Okwe shi komba po lela, molwaashi oku noku kala e shi na omukalo oo. Nge ke shi na omukalo oo, otapa kala shimwe shi li omhinge naye efimbo alishe, nomhangela yaye inene e na momadiladilo aye. Onghalamwenyo yaye mwene otai kala moshiponga, onghhee oku noku kala e na ouhamba waye aushe wa wana ngaashi ta dulu oku u mona.

¹⁰ Ohandi lipula paife kutya omwa shikula nge mwaashi, Omufindani munene ou handi lipula. Kesheshimwe moUhamba Waye oshi noku kala Shaye. Oshi noku kala omutima, omwenyo, nolutu, laYe. Itapa kala sha omhinge naYe. Kesheshimwe sha li omhinge naYe, Ye oku noku shi lekela. Ye oku noku kala e na lela kesheshimwe Shaye. Ndele eshi . . .

¹¹ Napoleon, okwa kufa omatanga ovakwaita, omakanona, eendjebo, omauta, omaongamukonda. Nokwa ya nediladilo limwe eli, kutya ota kwata ko ounyuni. Ndele sha yela okwe shi ninga, pomido omilongonhatu nanhatu. Eshi a li omulumenhu omunyasha, okwa li omungabeki. Ndele etumbalo laye linene ole mu ninga omulinomi; nosha ya momaliudo aye, nafiyo ta fi pomido omilongonhatu nanhatu, ongholwe. Ounwa waye, ina dula oku fikama. Ndele ohandi lipula omulumenhu, ou e li ngaha, pomido omilongonhatu nanhatu, a kwata ko ounyuni noku fya ongholwe, molwaashi etumbalo laye, noku kanifa

omulandu tuu ou a li ta lwile. Okwa li o—okwa li woludi lolupe olo, ile, ha olupe, ndi tye, ashike okwa li oshilongifo shomunawii. Ndele oku kendabala oku lwifa ounyuni, nokwa dopa, pomilongonhatu nanhatu.

¹² Ashike, akutu, linene eli, Ependa enaenghono olo handi popi, pomido omilongonhatu nanhatu, ola kwata ko kesheshimwe sha li kedu nomo—moheli. Pomido omilongonhatu nanhatu, Omufindani omunaenghono munene!

¹³ Ohandi lipula omalwoodi manene a luwa momapya. Otu shi shii, oku manifa Napoleon, kutya okwe uya pexulilo laye koWaterloo. Oya li omhito yange, ha nale unene, oku talulula omahopaeneno a ningwa ehanauno lomatamba aye, novalondi veenghambe vomulumenhu, nhumbi va kangavala mepya lolwoodi. Nomatamba a ndubilwa kumwe, omaulu a teka, e li lela momaluhaela, apa euliko linene eli la ningilwa.

¹⁴ Ndele oshi li oulili ngahelipi! Oku didilika omulumenhu oo pomilongonhatu nanhatu, nefifohoni olo la kangavala medimbulukifo lolwoodi laye linene nekwateko; noku ya kuJerusalem, noku tala kombila i li hamwasha, onga edimbulukifo lOmufindani omunaenghono munene.

¹⁵ Shimwe nashikwao, ope na sha mokukwatako. Nge otu na sha hatu dulu oku lwila, nge ope na omukifi molutu letu, nohatu kondjifa pokati keyo nomwenyo, efindano ngahelipi ngeenge twa mono la kwatwa ko. Nge ohatu kondjifa ondjikilile yonhumba inene, ile sha shonhumba shinene she tu findila poshi, ngeenge xuuninwa omapandela manene a dungadungwa notwe shi kwata ko; otashi tu pe eliudo ngahelipi, meni letu, osheshi ohatu dulu oku kala omufindani.

¹⁶ Paife ohandi lipula oita yaxuuninwa, nonhumbi eshi Hitler a kwata ko oWarsaw. Ndele Ovandowishi ove lipula kutya ola li limwe lomomafindano manenenene taa dulu oku kala, molwaashi kutya ondjai yavo inene, Adolf Hitler, oya ninginifa polumwe kesheshimwe moWarsaw, ya teya po eenhopa, nonhopa inene oya wa po. Oifo oya longela omafano manene okuwa po kwonhopa. Ovandowishi ova nyanya mepandavanda, nova denga eengoma nova shika eeshiva, nomayovi eedila dopombada okwa pita puye, ngaashi a mona efindano laye lotete linene. E li omutumba a fa Alexander Munene, ile Napoleon, a kwate ko ounyuni, ashike okwe lihanganga peni? Omefifohoni. Lelalela, okwe shi ninga.

¹⁷ Ohandi dimbuluka eshi va tunga Oupitilo waBurma munene. Ope noku kala . . . nge ova tauluka omhunda. Vamwe vomovamati ove li omutumba apa ongula ei, tashi dulika, ava va tauluka oupitilo munene ou. Osha li oshilonga ngahelipi! Osha pula oilonga lela ngahelipi, noshilonga lela osho va ninga! Noimaliwa ingapi sha pula oku tunga Oupitilo waBurma, eedola eemiliona! Ovamati ava va kanifa eemwenyo davo, moku

shi ninga! Ashike xuuninwa, nokonima yefimbo, eshi omaila yaxuuninwa yondjila ya ya, naashi oupitulo wa pwa, osha li omaingido efindano ngahelipi a dja movanhu! Ove na oupitulo kutya otava dulu oku taulukifa eemhunda, va mone efindano.

¹⁸ Ohandi lipula oupitulo mukwao, oo efiku limwe wa pula omwenyo wOmwene wetu a yambekwa. Kasha li ashike ondjila yokedu, ashike osha li ondjila yakula tai ifanwa “ondjila yakula youyuki,” omo itamu pitilwa kwaau ina yela, ashike okwaava aveke va dengwa oshilimbo. Ava aveke ve li kombinga oku Ye e li, otava pitile mondjila yakula ei.

¹⁹ Omafindano manene okwa monika. Vahapu vomufye nena ohatu dulu oku dimbuluka nawa Oita Yotete yOunyuni. Ohandi dimbuluka eshi nda li okamatyona, ondi udite eeshiva tadi shikwa; nokuli ovanamapya, mepya, va kangheka eenghambe davo, noku dungadunga omambale avo. Ova ingida. Ova kaluka. Oshike sha ningwa po? Oita oya xula. Efindano ola monika. Eliko linene olo twa li hatu kondjele, xuuninwa otwa mona efindano.

²⁰ Ohandi lipula oita younyuni yaxuuninwa ei. Onda kala pepandavanda. Ndele eshi eeshiva da hovela oku shikwa, ovanhu ova lotokela momalumbo; ovakainhu va djala oitetahema yavo, tave i dula mo, noku i vikavika mombada. Eeholo oda tuka momiti. Eeshiva oda shikwa. Eetuwa oda fiyafana mepandavanda. Ovanhu ova wila keengolo davo, noku yelufa omake avo pombada. Ova ingida. Ova lila. Omolwashike? Molwaashi oita oya xula. Ndele ovela, ovamati ovaholike ava va li kondje yefuta, otava yaukile diva keumbo vali kuvo. Efindano ngahelipi! Efimbo ngahelipi, neshambuko komutima keshe! Ekuwililo ngahelipi! Oufiku oo, kesheumwe okwa li mouwa, oto dulu oku ya mokandina noku lya, noku dja mo ino shi futila, osha li nawa. Oto dulu oku longifa otuwa yamukweni, osha li nawa. Oto dulu oku indila eshi wa hala, noto dulu lela oku shi mona. Molwaashi shike? Efindano ola monika. Ovamati okwa li tave uya keumbo. Ashishe osha xula.

²¹ Ndele ohandi lipula, mumwatate wange, oshii unene kutya omaliudo oludi olo ihaa kala po efimbo alishe. Ashike, kOmukriste, ongula ei, efindano ola monika. Eengedjo dehafo otadi kwelengedja. Oita oya xula, pokati kaKalunga nomunhu. Efindano ola monika.

²² Manga efindano keshe inali monika, ope noku kala eendado dinene tadi futwa. Akutu, eendado ngahelipi! Ndele omafimbo amwe odi li unene moule, notadi dulu oku ninga oivadi inene, etekauko. Ashike, opo tu mone omhunda, otu noku kala tu na olufilu. Manga inatu mona etango tali minikile, otu noku kala tu na odula. Manga inatu mona ouyelele, otu noku kala tu na oufiku. Manga inatu mona mondjila, ove noku kala ve na epuko, ile ngeno ito shiiva kutya epuko oshike.

23 Ashike opo u kwate ko noku mona olwoodi linenenene la monikile, Umwe a dja kOukwaalushe, omido dihapu da ya. Ndele Ye ine litwika Yemwene olupe lOmwengeli. Ye ine uya ngaashi omunhu wonhumba munene. Ashike Ye okwa li ta ka yelifa kutya itashi pula omauta neeholo, neeboma doatomika, oku finda oita. Ye okwe lidika Yemwene melininipiko, a fa okahanana, nokwa dalelwa metemba loimuna. Kapa li nokuli onhele yedalo laye, eshi Ye e uya. Onda hala mu tale koshilongifo sheshongo loita sha yooloka, eshi Ye a longifa.

24 Paife, omuhoko waAdam aushe owa li meemhango. Omo va li, vehe na elineekelo, vehe na Kalunga, vehe na omhito, vehe na onghenda, vehe na eshi tashi dulu oku va kwafela. Ovatondi vanene, omaukwamhepo ongaho a kana, ova idililwa momulaulu. Kapa li ondjila yoku dja mo. Kapa li umwe ta dulu oku kwafa. Kape na sha tashi dulu oku ningwa. Otashi monika sha fa filu, ekano lela.

25 Ashike Ependa letu, Eli la dja momikala dOshinge, tali kuluka!

26 Osheshi, kapa li omunhu kedu ta dulu oku longa oshilonga. Aveshe ova li, onga okupopya paunyuni, mombautu yelifa. Atushe otwa li, atushe, “twa dalelwa moulunde, twa mewa mowii, twe uya mounyuni hatu popi oipupulu.” Ndele kape na umwe womufye ta dulu oku kwafa mukwao. Otwa fikama tuhe na ekwafu, twa findika, edongakano kombinga keshe, atushe twa hanganunwa. Itatu dulu oku diinina eemhango noitufi, tu mone ounghundi wavo nosho tuu, itatu dulu oku shi ninga. Ndele osha fa ashike omuhoko aushe wovanhu wa kangavala wa hepa.

27 Ndele hano Ye okwe uya, Ye okwa kuluka. Molwaashi, “Ye okwa li pehovelu,” Ombibeli oya ti, “Ye okwa li Ondjovo.” Ye okwa li Omaukwatya aa a dja muKalunga. Ndele Omaukwatya, pehovelu, okwa li Ondjovo. Ndele Ye okwa ninga Ondjovo. Hano eshi Ye a londa mefiku loshinge olo lOpaasa, Ye ina ninga ashike Ondjovo, ashike Ye okwa ninga Omupristeli Omukulunhu wOndjovo Yaye Mwene. Akutu, oshinima shoshinge ngahelipi, Mumwatate Neville! Lipula ashike! Ye ke fi ashike Ondjovo, ashike Ye Omupristeli Omukulunhu wOndjovo Yaye Mwene. Ohatu shi limbililwa ngahelipi? Ohatu i kuYe ngahelipi noku haitavela kutya otwa tambula eshi twa indila? Osheshi, Ye Ondjovo nOmwiilikaneni wOndjovo! Omaukwatya okwa ninga Ondjovo, nOndjovo oya ninga omunhu; nomunhu elifa ou a li Ondjovo, okwa tambulwa mOshinge, nopaiife oye Omupristeli Omukulunhu ta ilikanene, kuYemwene, kOndjovo Yaye.

28 Osho tashi pula! Osho oshilongifo Ongeleka i na. Oshilwifo ngahelipi! Inapa kala nale shimwe she Shi fa. Ye okwa li Ondjovo. Ndele eshi Ye e uya, Ye okwa dalelwa metemba loimuna. Ye okwe uya oku longifa oshilwifo sho-h-o-l-e, ohole, a kwate ko ounyuni; ha netanga lovakwaita li na eeholo, ha

neendjebo domashina neetenga. Ashike Ye okwe uya monghedi ya yooloka. Ye okwe uya molupe lohole. Ye okwa li ohole yaKalunga.

²⁹ Oshikando shimwe, onga okamatyona, onda kala handi lipula kutya Kristus oku hole nge, naKalunga oku tonde nge; molwaashi kutya Kristus okwa fila nge, ashike Kalunga oku na sha omhinge naame. Ashike onde uya oku mona mo kutya Kristus oye lela omutima waKalunga. “Osho Kalunga a kala e hole ounyuni, Ye okwa yandja Omona Waye ewifa, opo keshe ou te Mu itavele aha kane, ndele nee a mone Omwenyo waAlushe.”

³⁰ Paife Ye okwe uya, tete, oku kwata ko. Ndele oshinima osho omunawii a tula mounyuni osha li outondwe. Ndele Ye okwe uya oku kwata ko outondwe. Eshi twa findana omalwoodi etu, nosho tuu, momalwoodi ounyuni, alushe okwa ya, shelitwikila, outondwe; molwaashi, omalwoodi oludi olo omutondi. Ashike Kristus okwe uya nohole, a kwate ko outondwe, a hole ava vehe holike. Ye okwe uya noshilwifo sha yooloka. Ndele Ye okwe linipika Yemwene, “e dulike kOvaengeli,” a hepe efyo, noku yandja oshihopaenenwa. Ndele eshi Ye a li oku kedu, Ye okwa enda mokati kovanhu.

³¹ Ye okwa yelifa oilwifo Yaye yokushonga oita, eshi Ye a velula ovanau. Eshi Ye a kufa oumungome vatano neeshi mbali, noku palula ovanhu omayovi atano, Ye okwa yelifa kutya Ye oku na eenghono kombada yoatomika keshe ya li ko. Ha eeshi adike Ye a shitukifa, ashike Ye okwa shitukifa eeshi da telekwa. Ha oufila auke Ye a shitukifa momingome odo, ashike Ye okwa shitukifa oufila wa telekwa momingome odo. Osha ulika kutya Ye okwa li Omufindani omunaenghono munene! Ha omeva aeke Ye a mona mondungu, ashike Ye okwa shitukifa omeva, omaviinyu, okudja mondungu. Ye okwa yelifa Ye e na Eenghono oku kwata ko. Ndele Ye oku hole, noshilwifo Shaye osha li ohole. Paife didilika.

³² Hano eshi Ye e shi ninga, eshi Ye a fikama efiku limwe pomunghulo wombila yaLasarus, nopa li omulumenhu, a fya, a pakwa omafiku anhe. Nokuli naava va li po, ova ti, “nokuli paife okwa nyika.” Eyulu laye ola mbonyokela mo, omainyo omoshipa otae likoko mulo. Ndele Jesus okwa fikama, onga Omufindani omunaenghono, eshi Ye a ti kuMarta naMaria, eshi Ye a fikama, “Hano Inandi ku lombwela, ‘Nge to itavele ashike, oto mono oshinge shaKalunga?’” Ye okwa mana ashike oku popya (eshi va ti, “mumwatate wetu okwa fya,” nosho tuu), Ye okwa ti, “Aame enyumuko nOmwenyo! Ou ta itavele Nge, nande nahangike a fya, ota kala nomwenyo. Naau e nomwenyo ndele ta itavele Nge, ita fi vali fiyoalushe. Hano Inandi shi ku lombwela kutya daAlushe, Eenghono da yambekwa odi li mwAame?” Ye ina ninga ashike etumbulo, Ye okwa dula oku longa mo kesheshimwe osho Ye a ti, osheshi Ye okwa li Omufindani omunaenghono.

³³ Okukala muYe, a diinina, a uvikwa mombebelela younhu, onga omunhu, ashike meni inamu kala sha ndele nee oKalunga Omunaenghono adishe, Umwe omunaenghono munene. Ye ota dulu oku shitulula. Ye ota dulu oku shita oinima ipe. Ye ota dulu oku popya, naashi Ye a indila otashi yandjwa mosekonde oyo. Ashike, Ye okwe lininipika Yemwene, Ye okwe lixupipika. Ye okwa hala oku yandja oshihopaenenwa. Ye okwa hala oku kala Omufindani woludi lomondjila, ndele Ye okwa li. Paife, Ye okwa yelifa Yemwene e li.

³⁴ Ngaashi luhapu nda ti moshiongalele shange, pamwe otashi ningi oundombwedi ongula ei, mongudu ei yovanhu, mongula ei iwa yOpaasa. Omukainhu, wongeleka yonhumba inai itavela mokutambula Ohonde yOmwene Jesus. “Pehe na etiko lOhonde, kape na edimepo lomatimba.” Okwa lombwela nge kutya Omunhu okwa li ashike omuxunganeki, Omunhu muwa, nonde mu ninga Oukalunga. Onda ti, “Ye okwa li Oukalunga. Ye okwa li Kalunga.”

Okwa ti, “Oto kendabala oku Mu ninga munene unene.”

³⁵ Onda ti, “Kape na oitya tai dulu oku ndjadjukununa onunene Waye!” Elaka lomunhu inali mona nale endjadjukununo!

³⁶ Okupopya nomulumenhu efiku limwe, omukalelipo a dja koWashington, DC, nokwa ti, pokahokololoumbangi po—poshiumbululwa apa twa li twa ongala pamwe, okwa ti, “Mumwatate Branham, onda kala Omulutheri onghalamwenyo yange aishe. Ashike,” okwa ti, “efiku limwe fimbo e li pepapuduko loshikulu shonale,” ta ti, “Onda twa eengolo koaltari, nonda hala oku mona eshiivo naKalunga.” Okwa ti, “Ndele fimbo nda li keengolo dange...” Paife, ou okwa li omukalelipo waWashington nokuli a xupifwa koshi yOmupresidente Cooledge. Ndele eshi ye “a tala pombada,” okwa ti, “Onda mona emoniko laJesus.” Okwa ti, “Ohandi dulu oku popya omalaka omuwoi a yooloka, nawa.” Okwa ti, “Ashike ihandi dulu oku mona oshitya shimwe oku tonga, shomomalaka aeshe oo omuwoi.” Okwa ti, “Onghee onda yelufa ashike eke lange, ndele Ye ta pe nge limwe lipe, oku popifa.” Okwa ti, “Onda mona ashike Oshinge shoshipala Shaye.”

³⁷ Omukainhu ou ta ti kwaame, okwa ti, “Mumwatate Branham, Jesus ka li sha ashike omunhu, omuxunganeki ashike.”

Onda ti, “Ye okwa li Kalunga, mumwameme wange.”

³⁸ Okwa ti, “Oto Mu ningi Oukalunga, ashike Ye ke fi.” Onghee okwa ti, “Mondjila yokuya, oku angula... a nangala, ombila yaLasarus, Ombibeli oya ti, ‘Ye okwa lila.’”

³⁹ Oshili, Ye okwa li lela omutima waKalunga. Ye okwa hepa ngaashi hatu hepa. Ye okwa li ombelele ngaashi tu li ombelele. Ye okwe litwika, molutu Laye, omahalo elifa naikwao hatu ningi.

Tuu, oku ninga Eyambo la wana, Ye oku noku shi ninga. Ye okwe shi ninga. Ashike onda ti . . .

Okwa ti, “Ye okwa lila, ta i kombila yaLasarus.”

⁴⁰ Onda ti, “Ashike, akutu, mukainhu, oshi li mondjila. Ye okwa li Omunhu, eshi Ye a li ta lili. Ashike eshi Ye a fikama po, pomunghulo wombila oyo, opo pa li elimweneno, a nangala a fya; opo pa nangala olutu la ola, la tuvikwa nokalapi; eshi a ti, ‘Angulei ko emanya.’ Ye okwa shilila okalumbubu Kaye kumwe, ndele ta ti, ‘Lasarus, dja mo!’ Ndele omulumenhu a kala a fya, omafiku anhe, okwa fikama keemhadi daye.”

⁴¹ Okwa li shike? Enyonauko oli shii Omushiti walo. Omwenyo ou shii Mwene wao. Ndele Omufindani omunaenghono munene oo okwa yelifa kutya Ye oku na Eenghono defyo, Omaulu noheli, nombila.

⁴² Shili, Otashi shambula omitima detu! Popya kombinga yoku hambula oipana, noku shika omaluvinga? Ounyuni owa wana oku kala mekuwililo ongula ei, ngaashi inashi kala ko nale, noku ingida noku kaluka molwa ovanhu Vaye, molwaashi eli efiku ledimbuluko olo eshi Ye a kwata ko omutondi waxuuninwa, noku mangulula eenghwate fye.

⁴³ Eheni, Ye okwa li Omunhu. Oshi li mondjila. Ye okwa yelifa e li Omunhu, ndele Ye okwa yelifa e li Kalunga. Oufiku umwe eshi . . .

⁴⁴ Efuta linene la pindjala, olo la ifana eemwenyo omayovi. Pamwe vamwe vomunye oomeme mu li apa, ongula ei, ovamati veni ova fila mefuta la pindjala kwinya, pamwe va ningina momakufikufi momapya olwoodi a mbwalangadja ounyuni ou. Vamwe vomovaholike veni oko va nangala, pamwe koshi yefuta.

⁴⁵ Ashike oufiku umwe eshi Ye kwa li a nangala mokambautu, nomakufikufi a li taa xwanauka mefuta, a fa oshituvikilo shekende. Ye okwa penduka, ndele ta tula omhadi Yaye komungenge wombautu. Ye okwa lyaamena kEulu, ndele ta ti, “Mwena.” Nokomakufikufi, Ye okwa ti, “Lota!” Ndele efuta olo leenghono ola lalakana fiyo kapa li ongonoyoto mulo. Lelalela, Ye okwa li!

⁴⁶ Oshili kutya Ye okwa endjelela a fa Omunhu. Eshi Ye a dja ko komhunda ndele Ye okwa li a fya ondjala, a tala komuti molwa sha shokulya, Ye okwa li Omunhu. Ashike eshi Ye a kufa omingome nhano odo neeshi dishona, noku palula omayovi atano, Ye okwa li e dulife Omunhu.

⁴⁷ Eshi Ye a fya omido omafele omulongonomuwoi da ya, efiku manga onghela, a endjelela komushiyakano, ta lilile onghenda, “Kalunga Kange, Kalunga Kange, oshike Wa ekela nge shi?” Ye okwa fya ngaashi Omunhu. Ashike omido omafele omulongonomuwoi nasha da ya, ongula ei, Ye okwa yelifa eshi Ye a li! Ye okwa yandja oshipatifo shaxuuninwa shoukwamessias

Waye eshi Ye a matula omalapi efyo noheli pokati, nokunyumuka mombila, omufindani, “Ondi nomwenyo fiyoalushe! Ndele, molwaashi Ondi nomwenyo, omu nomwenyo yo!”

⁴⁸ Ope na Omufindani! Popya kombinga yokuvakula ko oitetahema noku i dungadunga? Ovanhu tava ti otwa pwiduka molwaashi hatu ingida noku lotoka, noku ingida noku kaluka. Inava uda nale omidumo defindano dokEulu, kutya, “Olwoodi ola xula!” Wetu munene, Omufindani omunaenghono okwa mona efindano keshe! Ye okwe lifikamena po, ongula ei, ita kumwa!

⁴⁹ Eshi Ye e uya kedu, ove Mu pa edina la xutuka tava dulu oku Mu pa, onga “omupwilili.” Ove Mu ifana *Belsebul*, “omukulunhu weendemoni.” Oshi li mondjila. Ye okwa ya koshilando sha xutuka shi li kedu, Jeriko, ndele omulumenhu munini lela moshilando e noku konga e Mu mone. Ashike eshi Kalunga, omido omafele omulongonomuwoi da ya, okwe Mu nyumuna! Ovanhu osho ve Mu ningila. Ashike, noshilwifo shohole, Ye okwa finda omunawii keshe.

⁵⁰ Ndele Kalunga okwe Mu lenga pombada, noku Mu pa Edina li li pombada yedina keshe li li ko la lukilwa mOmaulu nokedu. Edina keshe mEulu otali nyongama kEdina la “Jesus”! Omwengeli keshe, oshidale keshe, kesheshimwe otashi nyongama kEdina la “Jesus”! Elaka keshe otali Mu hepaulula, ongolo keshe otai Mu twile eengolo. Ndele Ye okwa londa pombada, fiyo nokuli Ye ta tale poshi a mone Omaulu. Oye Omufindani omunaenghono! Oye Umwe e shi ninga! Eshi Ye a fiya po edu, konima, onguloshi ya dja ko twa li tu na, Ye oku na eeshapi defyo nodoheli da endjelela ponho Yaye, amen, “Ino tila, Aame Ou nda li nda fya, nOndi nomwenyo fiyoalushe. Ndele” (*ndele* osho oshikwatakanifi) “Ondi na eeshapi defyo nodoheli, da endjelela *apa*.” Popya kombinga yOmufindani! “Ndele, molwaashi Onda findana, Onda ninga ashike ondjila yakula mu ende mo.”

⁵¹ Omunhu okwa anywa okudja kEulu, ondjila yakula oya patwa. Kapa li ondjila yakula. Ashike, apa paha li ondjila yakula, Ye okwe uya oku ninga imwe. Akutu, kutu! Omukweyo wotete okwa li eendemoni delimbililo, wa shikula ko owa li olwaamaminga, wa shikula ko owa li okuliholemwene; edu eli ola tuvikilwa nomikweyo deenghono dondemoni; opo nee ouvela, omikifi. Ashike eshi Ye a hovela oku londa kEulu! Onguloshi otwa li tu Mu na ta di moheli, neeshapi defyo nodoheli ponho Yaye. Ongula ei ohatu Mu nenepeke. Halleluya! Eshi Ye a nyumuka, Ye oku na...Ye okwa li omufindani. Ndele, ngaashi Ye a ya, Ye okwa teya eenghono keshe domunawii da dama ovanhu. Ye okwa londa pOmbada, noku pa ovanhu eeshalinghenda, eeshalinghenda dOmhepo Iyapuki. Omufindani omunaenghono! Ye okwe lifikamena po, ongula ei! Ndele, pokati Kaye nomwiitaveli keshe, ope na ondjila

yakula youyuki yelao omo ovayuki tava ende. Kape nomukalo woku kukuma. Ope na omufinda umwe auke wa tetwa okudja kOukwaalushe. Ye okwa fiya po Eenyole dOhonde ngaashi Ye a enda momikala deenghono dondemoni, noku tu ningila ondjila yakula, omukokomoko wondjila aushe. Ye oku li pOmbada, ongula ei, onga Omufindani omunaenghono!

⁵² Ovanhu Vaye ove na ekuwililo. Omayovi omilongo omuvo, mounyuni, otava ingida efindano.

⁵³ Onda tala oku ya mongeleka oku kwongaho kwatalala kukulu. Ohandi lipula umwe ta ti. . . Ohandi ku ulikile eanyo lasho.

⁵⁴ Apa, diva eshi Oita Yotete ya xula, etumwalaka tali uya nondjila apa, le uya mobesa yOmukonga. Ova ti, “Eweelelo alishe olashike? Ashishe oshi li kombinga yashike?”

⁵⁵ Ndele umwe womuvo okwa ti, “Tala oku, ombapila oyei. Oita oya kuka.” Ndele kesheumwe ota lili ta ingida.

⁵⁶ Ashike omukainhu umwe okwa ti, “Akutu, kutu, omolwashike ino ku xula ngaho?” Ta ti, “Ngeno oya kalele vali omafiku mashona,” ta ti, “John naame ngeno otu li omutumba mepandavanda twa pupalelwa.” Ta ti, “Ngeno otu li omutumba apa.”

⁵⁷ Opa li omulumenhu a fikama konima, mekende lobesa; a kwata omukainhu oo, konyala e mu ekela momuvelo. Ndele eshi omupolifi a manga omulumenhu, okwa ti, “Etomhelo nde shi ningila,” okwa ti, “omukainhu oo ke na ko umwe e na ko na sha naye. Ashike ondi na ko ovamati vavali.” Okwa ti, “Itandi dulu oku lididimika.”

⁵⁸ Akutu, mumwatate! Ondi na ko tate. Ondi na ko ovaholike. Oshimwe kwaame, eshi Jesus a kwata ko. Ondi na omwalikadi. Ondi na okahanana. Ondi na ovaholike. Omunene, Omufindani omunaenghono! Oto dulu oku ifana nge “omwiingidi muyapuki” ile o “omupwilili omukwamhepo,” keshe tuu eshi wa hala. Ashike, ngeenge handi lipula oita inene oyo, oya pwa, ondado oya futwa, efindano ola monika. Jesus okwa nyumuka koufi, oshipatifo shaxuuninwa shoukwamessias Waye, ashishe osha xula. Ye oku nomwenyo, ongula ei, neeshapi defyo nodoheli. Ondi na ovaholike ve li keengaba. Ondi li kondjila yakula ikulu lela ei, handi ke va mona. Ino diladila nda pwiduka. Akutu, ashike onda hafa unene ashishe osha pwa! Oshilonga sha pwa.

Okukala, Ye oku hole nge; okufya, Ye okwa
xupifa nge;
Okupakwa, Ye okwa kufa po omatimba ange;
Okunyumuka, Ye okwa yukipalifa nge oshali
fiyoalushe;
Fiku limwe Ye ote uya, Akutu efiku loshinge!

59 Eshasho likulu eli lOmhepo Iyapuki la yambekwa, oku tu wilika mondjila yakula iwa ei, akutu, Oli li loshinge ngahelipi! Ohandi Li fi ohoni ngahelipi? Onda fikama pamwe nOmuyapuki Paulus, ongula ei, ta ti ngaha, “Inandi fya Evaengeli laJesus Kristus ohoni, osheshi Olo Eenghono daKalunga dokuxupifa.” Olo Eenghono kouvela. Olo Eenghono kefyo. Olo Eenghono kombila.

60 Eshi mudjuu oo, omuyapostoli mukulu e uya pexulilo londjila yaye, nova fa ko ombila yaye, nefyo la li le mu taalela moshipala, okwa yola koshipala shalo. Okwa ti, “Efyo, oshitwifo shoye oshi li peni? Ombila, efindano loye oli li peni?” Hano okwa ingida omahambeleso aKalunga, “Ashike Kalunga na pandulwe Ou e tu pa efindano mOmwele wetu Jesus Kristus!”

61 Omufindani omunaenghonoleda ou a kala ko, Omufindani omunaenghonoleda ou a fya, osheshi Ye okwa li Umwe ake ou a dula oku kwata ko; a fya, noku kwata ko efyo lovene, nokunyumuka mefindano! Ye okwa yelifa eshi Ye a li. Osha li oshipatifo shaxuuninwa shoukwamesias Waye.

62 Ndele paife, pakuhetekela, nge ope na umwe metungilo omu ongula ei, ou e li oshilyo shongeleka sha lomoka, ndele ke shii ehafo lolwoodi la xula. Ovanhu va ingida, ovanhu va hambelela, ovanhu va lila! Oto ti, “Omukundu washike u va kwete?” Ove shi shii kutya oshinima sha pwa. Osha xula! Oshili! Ohatu [Mumwatate Branham ta hakele omake aye—Sd.] denge eengoma. Ohatu ingida omanghuma, nEvaengeli otali i. Efimano neenghono daKalunga oda shiivika. Ndele oshilonga sha pwa, eudafano ola shangwa; efimano kuKalunga, Kristus okwe li shanga mOhonde Yaye Mwene! Olwoodi ola xula. Efindano ola monika. Itandi li mono vali; Ye okwe li mona! Onde li hafela. Akutu!

63 Eshi vamwe vomovamati ava va aluka kondje yomafuta, ova lombwela nge, eshi oshikepa ye uya moNew York, ngaashi ye uya petulilo, ova tala ko ndele tava mono Omufika wEmanguluko. Oshinima shotete wa mona, sha djuuka. Ova yambuka, vamwe vomuvo oonakulwa voingudu ve li polukolongo loshikepa, opo ve u mone. Ndele eshi va hovela oku mona Omufika wEmanguluko oo, ova hovela oku lila. Ova lila. Inave shi lididimikila. Omulumenhu akula munene a fikama, omulumenhu womake madjuu akula, ta dekweta ta kakama. Inava dula oku lididimika. Omolwashike? Osha li edidiliko lefindano. Konima ashike yOmufika wEfindano oo, wa nangala...wa li tate, meme, ovaholike, omuholike, omwalikadi, okahanana, ashishe shi li kedu oku shiholike kuvo, sha kala konima yao. Ndele manga ashike inava ya mo, ova dimbulula, osha li edu lemanguluko neumbo lomapenda. Shili, otashi linyengifa omaliudo oye, ebandela likulu olo tali pepe. Shi diladila, nakulwa a tilifwa olwoodi te uya petulilo! Lelalela, ola li efimbo liwa.

64 Ashike, akutu, mumwatate, imwe yomeengula edi, eshi Oshikepa ikulu yaSion tai shiki, nondi wete edidiliko la fikama, Omushiyakano mukulu woingholongonyo! Fimbo omhepo tai denge omapandela ayo mambudu akulu, ngaashi tae linyenge mondau yefyo. Oshi li efindano ngahelipi! Omolwashike, kape nonghumwe itatu dulu oku lididimika twa mwena! Shimwe osha ningwa po; otwa ninga ovakwashiwana vakwao. Oshinima osha pwa.

65 Eshi va kutila onhopa inene pokati kOumbanganhu no—no—no—nOumbuwanhu waAustralia, okudja koSidney, okuya kOumbuwanhu waSidney. Nhumbi omulumenhu keshe a kufa. . . Omolwashike, ova ya moshilongo amushe, va kendabale oku mona omulumenhu ou e shi longa. Oshilonga osho okwa li shinene, shaashi ova ti kape na ou ta dulu oku shi longa. Lwaxuuninwa, omulumenhu a dja koEngland a ti, “Oshilonga ohandi shi longo.” Ndele eshi a fika ko a longe oshilonga osho, okwa yeleka omuta keshe ya ya monhopa. Efimano laye oli li moshiponga. Okwa yeleka edu alishe nakesheshimwe sha ya mo. Okwa ya, naashi dingi ta dulu oku mona; okwa mona ovapangeli dingi lela, ovanamiti dingi lela, kesheshimwe dingi lela ta dulu oku mona, puye. Ndele, xuuninwa, eshi onhopa ya pwa, nefiku le uya opo i noku yelekwa.

66 Ovasheki ova fikama kombinga imwe, tava ti, “Itai kala po. Otai halakana po. Oku nefululu unene kwinya.”

67 Ashike okwa fula mokule, mokule, mokule, mokule lela. Ye oku neyombamo. Ye oku shii kutya kesheshimwe osha yelekwa. Ndele okwa ti, “Ohandi taulukile ko olweendo lotete, amemwene.” Ndele eshi a tauluka onhopa, komesho yokukulunhu woshilando, monima ngaha; nomashina okolutenda, hanga omapaamena ahamano, ta e uya, ta e linyengifa onhopa oyo. Omulumenhu ou e i ninga, okwe uya komesho yokweenda oku, ngaha, “Nge oya u, ondi li nayo.” Ashike oku nomukumo.

68 Oo omukalo Omwene wetu a yambekwa a ninga eshi Ye a ninga Ongeleka Yaye! Ye okwa yeleka keshe omuta, kesheshimwe tashi i muYo, osheshi Oi noku koshwa nOhonde! Ndele omusheki umwe okwa ama ombinga imwe, ta ti, “Onduba yovaingidi vayapuki, itave shi wanifa.” Ashike efiku limwe loshinge! Ou munene, Omufindani omunaenghono ta ende komesho yetu, a findana! Na dume, a ninge eshi a hala, Ye ota. . . Itapa kala umwe e livakela mo, nandenande, osheshi Ye okwa ningwa ondjila, nokwe i manifa. Shili!

69 Ohatu diladila nena shi na sha novanhu, twa tula omadiladilo etu koinima younyuni. Ashike nandi ku lombwele sha, mumwatate, inandi fya nande Evaengeli ohoni! Akutu, mumwatate, ame owoshikulu shonale, omudalululwa, omudalwa

kOmhepo Iyapuki, kOmhepo yaKalunga. Osho nda dalwa, osho ashike ndi li, nosho ashike nda hala oku kala.

⁷⁰ Oshikando shimwe, ha nale unene, opa li okakadona ka ya kofikola yokuuike. Ndele oka li kawa, okakadona kanini. Ndele eshi ka alukila keumbo, oka etelela omadiladilo ako amwe okokuuike.

⁷¹ Ndele pamwe, ongula ei, vamwe vomunye omu nomadiladilo eni amwe okondje. Pamwe omwa longela, kongeleka, omadiladilo eni mahapu. Iya, a efeni, oshinima shixwepo ndi shii oku ninga.

⁷² Ndele okakadona aka, eshi eshina lokolutenda la kanghama komesho. Okwa etelela okakadona pamwe naye, kamwe koludi loindjola inai dja mo nawa, ou weteko, ngaashi oludi laElvis Presley. Ndele eshi ka li ofika, ou weteko, meshina lokolutenda. Ina okwa li kondje; omukainhu womukulupe a fikama po, mutilifi, moshipala; kashona, omapepe a vandalala; okakutu kocalico, okakelive komapepe aye. Ndele okakadona aka koindjola inai dja mo nawa ka li naye, okakadona aka kakwao, oka tala poshi, noku tya, “Iya, olyelye ou omukwanaluhepo, epongo tali monika nai?”

⁷³ Iya, ou weteko, osha fifa okakadona ohoni unene, oka ti, “nghi shi shii,” shaashi okwa li unene alungama, noke na unene omadiladilo mahapu opaunyuni momutwe wako. Ndele osha li ina yako vene.

⁷⁴ Eshi ka heluka meshina lokolutenda, ina okwa lotokela ko, e ka papatele. Okwa ti, “Akutu, omuholike, Kalunga na yambeke okamutima koye.” Ndele oka pilamena ko noku enda taka i, onga kehe mu shii. Oka li ka fya ohoni, molwaashi ina okwa li mwii unene.

⁷⁵ Ndele osha ningwa, omuyakuli meshina lokolutenda, oku shii ehokololo. Okwa endaenda ko, nokwa tula omake aye komapepe okakadona aka, te ka pungululile komesho engungo, ta ti, “Ohoni kwoove! Ohoni kwoove!” Ta ti, “Onda mona oikando ihapu eshi nyoko a li muwa oikando omulongo ngaashi ove.” Ta ti, “Okwa li muwa. Ohandi di poushiinda.” Ndele ta ti, “Owa li okahanana, ndele owa li pombada mokalutala koye. Ndele nyoko okwa li ta nyaneke oikutu moluumbo.” Ndele ta ti, “Ombaadilila, ediko ola kwata omundilo, neumbo alishe ola li momutemo. Ndele eshi nyoko a lotoka, e shii kutya owa li pombada, penya.” Ta ti, “Ova ingida, noku kendabala oku mu kwata. Ashike okwa panuna mo eshi kwa li e na, a kufa mo, noku lotoka momitemo omo, pombada penya; noku shila ko oikutu kolutu laye, noku ku tonyena mo. Ndele oye ou te uya, ta aluka momitemo, eku humbata. Ndele okwa ngabuka, moluumbo, naave momaoko aye.” Ndele okwa ti, “Okwa kufa eshi kwa li ngeno shi mu amene, noku ku amena.” Ndele ta ti,

“Etomhelo umuwa nena, olo etomhelo mwii. Ndele, owa hala oku lombwela nge, to fi ohoni yoivadi oyo i li kunyoko?”

Ohandi lipula nena:

Nge Jesus na humbate omushiyakano aeke,
Nounyuni aushe u ye wa manguluka?
Ope nomushiyakano wakeshe umwe,
Nope nomushiyako wange.

⁷⁶ Nge Jesus okwa talika ko “Belsebul,” kounyuni ou, Ye okwa yolwa noku shekwa, noku endjeleleleka komushiyakano, noku fifwa ohoni, molwa nge; onda hafa unene oku humbata ohoni youyapuki Waye. Eheni, omufimanekwa, a ifanwa “omwiingidi muyapuki,” keshe osho wa hala oku ifana, keshe epopyo wa hala oku ninga. Itashi likangheke nande okashona. Onda hafa ashike, ongula ei, kutya, momutima wange, Kristus a nyumuka oku nomwenyo nota pangele. Ame oumwe womovapangelwa Vaye. Onda linekela kutya omu li, yo.

⁷⁷ Efimbo letu ola ya paife. Oheyali komutwe lela, eshi twa ti ohatu lekele. Elongelokalunga tali ya otali hovele lwomeetundi mbali, paife, petata lomulongo.

Natu nyongamekeni omitwe detu, okafimbo ashike, meilikano.

⁷⁸ Tate Omukwaulu a yambekwa, ominute omilongonhe nanhano oda pita, Ondjovo oya tetekela. Omitima detu oda hafa. Ekuwililo ola twikila; ha ekuwililo lefiku limwe alike, ashike ekuwililo laAlushe! MOukwaalushe, Ovaengeli otava imbi. Akutu Kalunga, Ongeleka, ya findana, tai imbi. Eengedjo dehafo otadi kwelengedja. Eemwenyo odo da li da tokolelwa efyo, noku fya noku ya kombila yomunawii; omunawii okwa findwa! Efyo ola findwa. Ombila oya findwa. Ovela owa findwa. Ondjongo oya findwa. Ouyelani owa findwa. Outondwe owa findwa. Omayooloko okwa findwa. Oukukutu owa findwa. Elinomo ola findwa. Kesheshimwe osha findwa. Kristus Omufindani munene!

Tala, tala Omufindani omunaenghono,
(omutoti woitevo a ti)
Tala, Mu tala e li poluhaela,
Osheshi Ye Omufindani omunaenghono,
Okudja eshi Ye a taula etukulifo pokati.

⁷⁹ Ye okwa nhakula etukulifo olo la holeka ovanhu Kalunga, ndele paife Kalunga oku li mokati kovanhu. Ye okwa taula etukulifo olo la kelela eveluko laKalunga. Ye okwa taula etukulifo olo la kaleka omayambeko aKalunga. Ye okwa taula etukulifo olo la kaleka ehafo laKalunga. Ye okwa taula etukulifo olo la kaleka ombili yaKalunga. Paife etukulifo ola taulwa pokati. NOhonde Yaye Mwene, Ye okwa enda ngaashi Omufindani! Olwoodi ola xula, Ye okwe shi tu yelifila

menyumuko Laye. Ndele paife Omhepo Iyapuki ondombwedi, ya tumwa i tu wilike.

⁸⁰ Akutu Kalunga Omukwaalushe, nge ope na umwe ongula ei, ou a kala ta kowakowa, meni nokondje, okudja mondjila yakula, a wila pondjila; ina dula oku enda a yukilila mokati, nomapenda manene, omapenda manene oo ta a ende mokati kondjila yakula; ohatu ilikana, ongula ei, opo va yandje aishe yavo kwOove, va dje mo noku tyapula efindano eli la findanwa kOmwenene wetu a nyumuka. Shi wanifa, Tate, otwe shi indila mEdina laKristus.

⁸¹ Ndele fimbo tu na omitwe detu da nyongamekwa. Onda kumwa, mokafimbo aka, opo nge to yelufa omake oye kuKristus, noku tya, “Kristus, onda pandula, itandi Ku fi nande vali ohoni. Onda kala nda mbadapala ashike kashona.” Kalunga ne ku yambeke, mukainhu. Kalunga ne ku yambeke, omufimanekwa. Kalunga ne ku yambeke naave. Akutu, kutu, omake keshepamwe! “Onda kala nda mbadapala kashona. Onda kala nda fyohoni. Ndele onda mona onhele yange shili paife. Ka kwa li ndi noku shi ninga. Okwa li ndi noku fikama lela, noku yandja ehokololoumbangi lange! Osho ndi noku kala. Ondi noku lombwela kesheumwe, ‘Onda dalululwa.’ Ondi noku lombwela kesheumwe, ‘Onda pewa Omhepo Iyapuki.’ Inandi fya Evaengeli ohoni, osheshi Olo Eenghono daKalunga dokuxupifa. Onda hala shili oku kala Omukriste a yukilila. Hasho nda kala. Ashike, kekwafo laKalunga, okudja ongula ei yOpaasa, ohandi kala. Ohandi kala.” Umwe elili oto yelufa omake oye paife manga inatu ilikana? Kalunga ne ku yambeke, ove, ove.

⁸² Akutu, tala komatokolo! Hanga omilongombali nanhano ile omilongonhatu, ve li omutumba mokati kokangudu kovanhu aka ongula ei, va ninga etokolo. Okudja ongula ei inene yefindano, otava i, pafilonghenda laKalunga, fikama noku hafya ohoni Evaengeli, osheshi Olo Eenghono daKalunga dokuxupifa.

⁸³ Akutu Kalunga, ngaashi omake aa a ya pombada, nomusika tai udika iwa konima mondjila, ngaashi twa dja mo mefyo twe uya mOmwenyo, osheshi Ove owa ti, “Ou ta udu Eendjovo Dange, nota itavela Ou a tuma Nge, oku nOmwenyo waalushe.” Ova dja mo mefyo ve uya mOmwenyo, molwaashi Ove owa ninga efyo opo va ninge Omwenyo, oku pitila menyumuko Loye. Owa ninipikwa u dulike kOvaengeli, wa kuluka u ninge omunhu, wa dja mOlutu lopamhepo linene okudja Pombada, olo la ninga omunhu; no li nOhonde, noku tilashi Ohonde oyo, opo U tu ningile atushe ondjila yekukumo. Hano ha ku shi ninga ashike, (otwe shi lesa mOmbibeli), ashike Owe shi yelifa, iho dopa, moku nyumuka koufi, noku nyumuna ovafi eshi Wa li oku kedu; hasho ashike osho, ashike Owa yandja, Owe shi yelifa luvali, ngaashi Wa ningila Abraham; paife, kwaasho, Owa tuma Omhepo Iyapuki onga ondombwedi. Ndele otu nOukalipo Waye wa yambekwa pamwe nafye, nomufye, tau tu wilike, tau tu wilikile mOshili aishe nOuyeleele.

Tangi, Omwene, molwoku xupifa omwenyo wange.

Tangi, Omwene, molwoku velula nge.

Tangi, Omwene, molwoku pa nge,
Exupifo Loye linene liyadi noloshali.

⁹¹ Oshinima sheyambeko ngahelipi! Ou Mu hole? Tya, “Amen.” [Eongalo tali ti, “Amen. Amen.”—Sd.] Akutu, o . . . Kesheshimwe osha wanifwa paife, vamwange. Kesheshimwe osha pwa, kape na vali olwoodi, kape na vali eshongo loita, ku na eshi u noku ninga; osha ningwa nale. Ohatu tyapula ashike! Akutu, kutu! Otwa wana, muYe!

. . . yaamena,

Wa amenwa nowa xupifwa komayameko aeshe;

Yaamena, yaamena,

Yaamena kEke laalushe.

Akutu, oshiwa ngahelipi okweenda molweendo eli,

Yaamena kEke laalushe;

Akutu, ondjila oya yela ngahelipi tai kulu efiku nefiku,

Yaamena kEke laalushe.

Yaamena, yaamena,

Wa amenwa nowa xupifwa komayameko aeshe;

Yaamena, yaamena,

Yaamena kEke laalushe.

Ou to dulu, nou na okanasituke, ka kufa mo.

. . . akutu, yaamena,

Wa amenwa nowa xupifwa komayameko aeshe;

Yaamena, yaamena,

Yaamena kEke laalushe.

Ombibeli yoye paife!

Yaamena, yaamena,

Wa amenwa nowa xupifwa komayameko aeshe;

Yaamena, yaamena,

Yaamena kEke laalushe.

⁹² Oshikwa shike? Wa amenwa nowa xupifwa, ashishe osha xula, ashishe osha pwa, olwoodi ola xula, oshipatifo shaxuuninwa osha matulwa, Ye okwa londa. Halleluya!

Yaamena, yaamena,


Wa amenwa nowa xupifwa komayameko aeshe;

Yaamena, yaamena,

Yaamena kEke laalushe.

⁹³ Paife natu nyongamekeni omitwe detu tu taalele ondwi yedu omo Kalunga e tu kufa, omo fiku limwe hatu ka djuuka medu. Osheshi, Omwene wetu, ota kufa mondwi yedu, noku ya mondwi yedu; e tu pe Omhepo Yaye ihai xulu po, Ye okwa djuuka mondwi

yedu. Naaveshe ava ve li muYe, otava ka djuuka mo pamwe naYe fiku limwe, va ye koshilongo shovanelao.

⁹⁴ Ngaashi twa nyongameka omitwe detu. Ondi wete Mumwatate Smith mokati ketu, ongula ei, omufitaongalo wOngeleka yaKalunga; a dengela nge onguloshi. Mumwatate Smith, ila ashike. Onda kumwa paife, kutya nge Mumwatate Smith ote tu lekele mOndjovo yeilikano. Ngaashi tamu endelele oku ya komaumbo eni, noku lya oshiumbululwa sheni. Alukileni kelongelokalunga lOfikola yOsoondaxa, nelongelokalunga leshasho, meendelelo tali hovele petata lomulongo. Natu nyongamekeni omitwe detu, fimbo Mumwatate Smith ta lekele meilikano. 

OMUFINDANI OMUNAENGHONO MUNENE OSH57-0421s

(The Great And Mighty Conqueror)

OMISHOLONDODO DEPAUDUKO LOPAASA

Etumwalaka eli kuMumwatate William Marrion Branham, patamekelo layandjelwe mOshiingilisa mepito letango lOsoondaxa yongula yOpaasa, Apilili 21, 1957, kEtwaliongalo Branham moJeffersonville, Indiana, U.S.A., ola kufwa okudja kekwatelo lengenete teipa nola nyanyangidwa metwokumwe mOshiingilisa. Efatululo eli Oshikwanyama ola nyanyangidwa noku andjakanekwa koVoice Of God Recordings.

OSHIKWANYAMA

©2018 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE
58 DISA ROAD, ADMIRAL'S PARK, GORDON'S BAY 7140 WESTERN CAPE
REPUBLIC OF SOUTH AFRICA

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.

www.branham.org

Oufemba didiliko

Eemhito adishe oda kalekwa. Embo eli otali dulu okunyanyangidwa koprinta meumbo molwa elongifo lopumwene ile okuyandjwa po, oshali yovene, onga oshilongifo okuandjakaneka Evaengeli laJesus Kristus. Embo eli itali dulu ku landifwa, okwiindjipalekwa mondwanga, okutulwa kowebite, okutuvikilwa momukalo wonumba, okufatululilwa momalaka akwao, ile okulongifwa molwa eyambidido lopashimaliwa pehe na epitikilo laVoice Of God Recordings®.

Molwa ouyelele uhapu ile molwa oilongifo ikwao ili po, alikana kwatafana:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org